

Pa honra gran poeta

CAYA NOMBRA LOLITA ESMERALDA EUSON



ORANJESTAD(AAN): -- Aruba a conoce un caya nobo, yama Caya Lolita Esmeralda Euson.

E caya aki ta na unda tabata e Amalia van Bolmsstraat, banda di e Iglesia Methodistista.

E ta pa honra Lolita Euson, un persona hopi conoci na Aruba y den exterior.

Esaki entre otro, como poeta.

Lolita a nace na Sint Eusta-

tius riba 27 di october 1914 y a fayece na Aruba riba 13 di augustus 1994, na edad di casi 80 aña.

E tabata malo desde april 1993.

E imagen cu pueblo di Aruba tin di Lolita Euson, lo keda incompleto si no haci mencion di e manera cu el a biba su bida y di loke el a nifica pa e comunidad den cual el a traha.

E tabata un persona inteli-

gente y perseverante.

Muestra di esaki tabata cu el a alcanza e nivel di enseñanza di mas halto cu tabata tin e tempo ey na Sint Eustatius, esta, 7e klas.

E tabata e yiu chikito di un famia pover y grandi, y tambe esun travieso.

En busca di un mihor bida, e famia Euson, Lolita, un rumen y su mama a dicidi pa bin biba na Aruba.

Durante su bida, Lolita a traha na hospital na Eagle, Solamon's Store, lavanderia di LAGO y Panama Store.

E tabata yen di energia y alegría, y por a comunica cu grandi y chikito.

E tabata stima bida y tabata trece alegría unda cu el a yega, cu su chasconan, su hari, su positivismo y su devocion.

Hopi hende tabata acerke, algun pa pasa pret, otro pa conta un problema y en busca di un horea pa scuchanan, otro pa consuelo, pa pone un weso cu a sali for di lugar, pa hala un braza o un pia cu ta haci dolor y atrobe otro pa tende palabra di Dios.

Hende di e comunidad di San Nicolas, especialmente den e bario di Weg Fontein na unda el a biba gran parti di su bida, ta corda Lolita como un persona sumamente activo, maestra di Ingles, co-fundador di Statia Club, organizador di conciertonan y encuentronan di cancion y poesia na club

NWIWA, miembro activo di AVP, hungador di cricket, miembro di Womens Auxiliary di Iglesia Methodistista y naturalmente poeta.

Desde su niñez, Lolita tabata skirbi poesia cu tabata expresion di gran fe, esperanza y amor pa Dios, hende y Aruba.

Na aña 1981, el a ricibi e Premio di Oro como reconocimiento di su obranan, aunke cu e no a publica ningun buki di poesia te na e momento ey.

Tabata te na augustus 1988, cu su prome buki di poesia a sali.

E mesun aña, el a bolbe gana Premio di Oro pa su poesia "The islands that we love", cual premio el a ricibi na California.

Ademas di esey, el a saca carchinan di Pasco cu poesia.

Na 1981, Lolita a wordo condecora cu e medaya di honor di oro den e Orde van Oranje Nassau.

Lolita Euson tabata mama di cuatro yiu.

